

大般若波羅蜜多經卷第五百二十二 珠一

唐三藏法師玄奘奉詔譯

第三分見不動品第二十五之二

復次善現是菩薩摩訶薩其心堅固逾於金剛假使十方碗伽沙等諸佛世界一切有情皆變爲魔是諸魔衆各復化作爾所惡魔此諸惡魔皆有無量無數神力是諸惡魔盡其神力不能留難是菩薩摩訶薩令不能行甚深般若波羅蜜多所以者何是菩薩摩訶薩能如是行甚深般若波羅蜜多諸天子等常來禮敬親近供養請問勸發作如是言已得般若波羅蜜多方便善巧知一切法不

可得故善現當知若菩薩摩訶薩成就二法一切惡魔不能留難令不能行甚深般若波羅蜜多何等爲二一者觀察諸法皆空二者不捨諸有情類善現當知若菩薩摩訶薩成就二法一切惡魔不能障礙令不能行甚深般若波羅蜜多何等爲二一者如說悉皆能作二者常爲諸佛護念善現當知若菩薩摩訶薩能如是行甚深般若波羅蜜多諸天子等常來禮敬親近供養請問勸發作如是言善哉大士欲證無上正等菩提當勤住空無

相無願何以故善男子若勤住空無相無願一切有情無依怙者能作依怙無歸依者能作歸依無救護者能作救護無投趣者能作投趣無舍宅者能作舍宅無洲渚者能作洲渚與暗冥者能作光明與聾盲者能作耳目何以故善男子如是住空無相無願即爲安住甚深般若波羅蜜多若能安住甚深般若波羅蜜多速證無上正等菩提善現當知若菩薩摩訶薩能如是住甚深般若波羅蜜多則爲十方無量無數無邊世界現在諸佛處

大衆中自然歡喜稱揚讚歎是菩薩摩訶薩名字種姓及諸功德所謂安住甚深般若波羅蜜多真淨功德善現當知如我今者爲衆宣說甚深般若波羅蜜多在大衆中自然歡喜稱揚讚歎寶幢菩薩摩訶薩尸棄菩薩摩訶薩等諸菩薩摩訶薩及餘現住不動佛所淨修梵行住深般若波羅蜜多諸菩薩摩訶薩名字種姓及諸功德所謂安住甚深般若波羅蜜多真淨功德現在東方無量無數無邊世界一切如來應正等覺爲衆宣說甚深

珠一

二

般若波羅蜜多於彼亦有諸菩薩摩訶薩淨修梵行不離般若波羅蜜多彼諸如來應正等覺客於衆中自然歡喜稱揚讚歎彼菩薩摩訶薩名字種姓及諸功德所謂不離甚深般若波羅蜜多真淨功德南西北方四維上下亦復如是善現當知有菩薩摩訶薩從初發心行深般若波羅蜜多漸次圓滿大菩提道漸次圓滿甚深般若波羅蜜多乃至當得一切相智亦爲十方無量無數無邊世界一切如來應正等覺在大衆中自然歡喜稱揚

讚歎是菩薩摩訶薩名字種姓及諸功德所謂修行甚深般若波羅蜜多真淨功德所以者何是菩薩摩訶薩能爲難事不斷佛種利益安樂一切有情爾時善現便白佛言何等菩薩摩訶薩蒙佛世尊在大衆中自然歡喜稱揚讚歎名字種姓及諸功德爲不退轉爲退轉耶佛告善現有菩薩摩訶薩住不退轉行深般若波羅蜜多蒙佛世尊在大衆中自然歡喜稱揚讚歎名字種姓及諸功德復有菩薩摩訶薩雖未受記而修般若波羅蜜多

方便善巧亦蒙諸佛在大衆中自然歡喜稱揚讚歎名字種姓及諸功德具壽善現復白佛言此所說者是何菩薩佛告善現有菩薩摩訶薩隨不動佛爲菩薩時所修而學已得安住不退轉位是菩薩摩訶薩蒙佛世尊在大衆中自然歡喜稱揚讚歎名字種姓及諸功德復有菩薩摩訶薩隨寶幢菩薩摩訶薩尸棄菩薩摩訶薩等所修而學是菩薩摩訶薩雖未受記而勤精進行深般若波羅蜜多方便善巧亦蒙諸佛在大衆中自然歡喜稱

揚讚歎名字種姓及諸功德復次善現有菩薩摩訶薩行深般若波羅蜜多於一切法無生性中雖深信解而未證得無生法忍於深般若波羅蜜多雖深信解而未證得無生法忍於一切法畢竟空性雖深信解而未證得無生法忍於一切法皆寂靜性雖深信解而未證得無生法忍於一切法皆遠離性雖深信解而未證得無生法忍於一切法無所有性雖深信解而未證得無生法忍於一切法不自在性雖深信解而未證得無生法忍於

一切法不堅實性雖深信解而未證得無生
法忍善現如是等菩薩摩訶薩亦蒙諸佛在
大眾中自然歡喜稱揚讚歎名字種姓及諸
功德善現當知若菩薩摩訶薩蒙佛世尊在
味二
大衆中自然歡喜稱揚讚歎名字種姓及諸
功德是菩薩摩訶薩超諸聲聞獨覺等地必
得無上正等菩提善現當知若菩薩摩訶薩
四
行深般若波羅蜜多方便善巧蒙佛世尊在
大衆中自然歡喜稱揚讚歎名字種姓及諸
功德是菩薩摩訶薩必當安住不退轉位住

是位已疾證無上正等菩提復次善現若菩
薩摩訶薩聞說如是甚深般若波羅蜜多所
有義趣無疑無惑不迷不闇但作是念如佛
所說甚深般若波羅蜜多真理必然無有顛
倒是菩薩摩訶薩由於般若波羅蜜多深生
淨信漸次當於不動佛所及諸菩薩摩訶薩
所廣聞般若波羅蜜多於其義趣深生信解
既信解已當得住於不退轉位住是位已疾
證無上正等菩提善現當知若菩薩摩訶薩
但聞如是甚深般若波羅蜜多能生信解不

生誹謗尚多獲得殊勝善根況能受持讀誦
通利依真如理數念思惟安住真如精勤修
學是菩薩摩訶薩速當安住不退轉地疾證
無上正等菩提能盡未來利樂一切爾時善
現即白佛言諸法實性皆不可得如何可說

珠二

五

諸菩薩摩訶薩安住真如精勤修學速當安
住不退轉地疾證無上正等菩提能盡未來
利樂一切佛告善現如佛所化安住真如修
諸菩薩摩訶薩行速當安住不退轉地疾證
無上正等菩提爲諸有情作大饒益諸菩薩

摩訶薩亦復如是安住真如修諸菩薩摩訶
薩行速當安住不退轉地疾證無上正等菩
提爲諸有情作大饒益具壽善現復白佛言
如來所化都無所有法離真如竟不可得誰
住真如修菩薩行誰當安住不退轉地誰證
無上正等菩提誰爲有情作大饒益世尊真
如尚不可得何況得有安住真如修菩薩行
速當安住不退轉地疾證無上正等菩提爲
諸有情作大饒益此若實有必無是處佛告
善現如是如是如汝所說如來所化都無所

有法離真如意不可得誰住真如修菩薩行
誰當安住不退轉地誰證無上正等菩提誰
爲有情作大饒益善現真如尚不可得何況
得有安住真如修菩薩行速當安住不退轉
地疾證無上正等菩提爲諸有情作大饒益
此若實有必無是處所以者何如來出世若
不出世諸法法爾不離真如法界法性廣說
乃至不思議界決定無有安住真如修菩薩
行速當安住不退轉地疾證無上正等菩提
爲諸有情作饒益事何以故諸法真如無生

無滅亦無住異少分可得善現若法無生無
滅亦無住異少分可得誰住其中修菩薩行
誰當安住不退轉地誰證無上正等菩提誰
爲有情作大饒益此若實有必無是處但依
世俗假施設有時天帝釋便白佛言如是般
若波羅蜜多微妙甚深極難信解諸菩薩摩
訶薩行深般若波羅蜜多雖知諸法皆不可
得而求無上正等菩提欲爲有情作大饒益
甚爲難事所以者何決定無有安住真如修
菩薩行速當安住不退轉地疾證無上正等

菩提爲諸有情作饒益事而諸菩薩摩訶薩行深般若波羅蜜多時觀一切法都無所有於深法性心不沉沒無惑無疑不驚不恐亦不迷悶如是等事甚爲希有爾時善現語帝釋言憍尸迦汝所說諸菩薩摩訶薩行深般若波羅蜜多觀一切法都無所有於深法性心不沉沒無惑無疑不驚不恐亦不迷悶如是等事甚希有者憍尸迦諸菩薩摩訶薩行深般若波羅蜜多觀一切法本性皆空於此空中都無所有誰沉誰沒誰惑誰疑誰驚

誰恐誰迷誰悶是故菩薩摩訶薩行深般若波羅蜜多時於深法性心不沉沒無惑無疑不驚不恐亦不迷悶甚爲希有時天帝釋白善現言尊者所說無不依空是故所言常無滯礙譬如以箭仰射虛空若近若遠俱無滯礙尊者所說亦復如是誰能於中敢作留難珠二七時天帝釋即白佛言我如是說如是讚如是如是等事甚希有者憍尸迦諸菩薩摩訶薩記爲順如來應正等覺實語法語於法隨法爲正記不爾時佛告天帝釋言憍尸迦汝如是說如是讚如是記皆順如來應正等覺實

語法語於法隨法無顛倒記時天帝釋復白
佛言希有世尊大德善現諸有所說無不依
空無相無願亦依四念住乃至八聖道支亦
依四靜慮四無量四無色定亦依八解脫乃
至十遍處亦依布施乃至般若波羅蜜多亦
依內空乃至無性自性空亦依真如乃至不
思議界亦依苦集滅道聖諦亦依菩薩摩訶
薩地亦依一切陀羅尼門三摩地門亦依五
眼六神通亦依如來十力乃至十八佛不共
法亦依大慈大悲大喜大捨亦依三十二大

士相八十隨好亦依無忘失法恒住捨性亦
依一切智道相智一切相智亦依菩薩摩訶
薩行及佛無上正等菩提爾時迦尊告天帝
釋憍尸迦具壽善現住諸法空觀布施波羅
蜜多乃至般若波羅蜜多尚不可得況有行
布施波羅蜜多乃至般若波羅蜜多者可得
觀四念住乃至八聖道支尚不可得況有修
四念住乃至八聖道支者可得觀四靜慮四
無量四無色定尚不可得況有修四靜慮四
無量四無色定者可得觀八解脫乃至十遍

處尚不可得況有修八解脫乃至十法處者可得觀內空乃至無性自性空尚不可得況有住內空乃至無性自性空者可得觀真如乃至不思議界尚不可得況有住真如乃至不思議界者可得觀苦集滅道聖諦尚不可得況有住苦集滅道聖諦者可得觀空無相無願解脫門尚不可得況有修空無相無願解脫門者可得觀諸菩薩摩訶薩地尚不可得況有修菩薩摩訶薩地者可得觀陀羅尼門三摩地門尚不可得況有修陀羅尼門三

珠二

摩地門者可得觀五眼六神通尚不可得況有引發五眼六神通者可得觀如來十力乃至十八佛不共法尚不可得況有引發如來十力乃至十八佛不共法者可得觀大慈大悲大喜大捨尚不可得況有安住大慈大悲大喜大捨者可得觀三十二大士相八十隨好尚不可得況有以此相好莊嚴身者可得觀無忘失法恒住捨性者可得觀一切智道相無忘失法恒住捨性者可得觀一切智道相智一切相智尚不可得況有引發一切智道

相智一切相智者可得觀一切菩薩摩訶薩行尚不可得況有能行一切菩薩摩訶薩行者可得觀諸佛無上正等菩提尚不可得況有能證諸佛無上正等菩提者可得觀一切智智尚不可得況有能得一切智智者可得觀諸如來應正等覺尚不可得況有能轉無上法輪者可得觀無生滅法尚不可得況有能證無生滅法者可得何以故憍尸迦具壽善現於一切法住遠離住寂靜住無所有住住無所得住住空住住無相住住無願

珠二

九

住憍尸迦具壽善現於一切法住如是等無量勝住比諸菩薩摩訶薩衆所住般若波羅蜜多深妙行住百分千分乃至鄒波尼煞曇分亦不及一何以故憍尸迦除諸佛住是諸菩薩摩訶薩衆所住般若波羅蜜多深妙行住於諸聲聞獨覺等住爲最爲勝爲尊爲高爲妙爲微妙爲上爲無上以是故憍尸迦若菩薩摩訶薩欲住一切有情上者當住般若波羅蜜多深妙行住何以故憍尸迦諸菩薩摩訶薩住此住中超諸聲聞獨覺等地證入

菩薩正性離生疾能圓滿一切佛法永斷煩惱習氣相續速能證得一切智智得名如來應正等覺畢竟利樂一切有情令住人天三乘解脫時衆會中無量無數三十三天歡喜踊躍各取天上微妙香花奉散如來及諸弟子是時衆內八苾芻俱從座起頂禮佛足偏覆左肩右膝著地曲躬恭敬合掌向佛瞻仰尊顏目不暫捨佛神力故各於掌中微妙香花自然盈滿是苾芻衆踊躍歡喜得未曾有各以此花奉散佛上及諸菩薩既散花已

同發願言我等用斯勝善根力願常安住甚深般若波羅蜜多微妙行住聲聞獨覺所不能住速趣無上正等菩提超諸聲聞獨覺等地爾時如來知苾芻衆意樂清淨定不退轉即使微笑如佛常法從其面門放種種光青黃赤白紅紫碧綠金銀頤脈遍照三千大千世界其光漸攝還繞佛身經三匝已從頂上入時阿難陀既覩斯瑞歡喜踊躍即從座起禮佛合掌白言世尊何因何緣現此微笑諸佛現笑非無因緣唯願如來哀愍爲說爾時珠二十一

佛告阿難陀言此諸苾芻於當來世星喻劫中皆得作佛同名散花十號具足彼佛壽量所居國土必芻弟子一切皆同是諸如來皆住千歲初生出家及成佛後隨所在處若晝若夜常雨五色微妙香花由此因緣故我微笑是故慶喜若菩薩摩訶薩欲得安住最勝住者當學般若波羅蜜多慶喜

笑是故慶喜若菩薩摩訶薩欲得安住最勝住者當學般若波羅蜜多慶喜

當知若善男子善女人等精勤修學甚深般若波羅蜜多是善男子善女人等先世或從

人中沒已還生此處或從覩史多天上沒來生人間彼於先世或在人中或居天上由曾廣聞甚深般若波羅蜜多故於今生能勤修學甚深般若波羅蜜多慶喜當知如來現見若善男子善女人等能勤修學甚深般若波羅蜜多於身命財無所顧著當知決定是大菩薩復次慶喜若善男子善女人等愛樂聽聞甚深般若波羅蜜多聞已受持讀誦通利精勤修學如理思惟爲菩薩乘善男子等宣說開示教誡教授當知彼人是大菩薩曾於

過去親從如來聞說如是甚深般若波羅蜜多聞已受持讀誦通利精勤修學如理思惟亦曾爲他宣說開示教誠教授甚深般若波羅蜜多故於今生能辦是事慶喜當知是善男子善女人等曾於過去無量佛所種諸善根故於今生能作是事此善男子善女人等應作是念我先不從聲聞獨覺聞說如是甚深般若波羅蜜多定從諸佛聞說如是甚深般若波羅蜜多我先不於聲聞獨覺親近供養種諸善根定於如來應正等覺親近供養

種諸善根由是因緣今得聞此甚深般若波羅蜜多愛樂受持讀誦通利精勤修學如理思惟廣爲有情宣說無倦慶喜當知若善男子善女人等愛樂聽聞甚深般若波羅蜜多聞已受持讀誦通利精勤修學如理思惟若法若義若文若意皆善通達隨順修行是善男子善女人等則爲現見我等如來應正等覺慶喜當知若善男子善女人等聞說如是甚深般若波羅蜜多所有義趣深心信解不生毀謗不可沮壞是善男子善女人等已曾

供養無量諸佛於諸佛所多種善根亦為無量善友攝受慶喜當知若善男子善女人等能於如來應正等覺勝福田所種諸善根雖定當得或聲聞果或獨覺果或如來果而證無上正等菩提要於般若波羅蜜多甚深義

珠二十二

趣善達無礙修行布施乃至般若波羅蜜多安住內空乃至無性自性空安住真如乃至不思議界安住苦集滅道聖諦修行四念住乃至八聖道支修行四靜慮四無量四無色定修行空無相無願解脫門修行八解脫乃

至十遍處修行菩薩摩訶薩地修行一切陀羅尼門三摩地門修行五眼六神通修行如來十力乃至十八佛不共法修行大慈大悲大喜大捨修行無忘失法恒住捨性修行一切智道相智一切相智令極圓滿慶喜當知若菩薩摩訶薩能於般若波羅蜜多廣說乃至趣善達無礙修行布施波羅蜜多廣說乃至一切相智令極圓滿是菩薩摩訶薩不證無上正等菩提而住聲聞獨覺地者必無是處是故菩薩摩訶薩衆欲得無上正等菩提應

於般若波羅蜜多甚深義趣善達無礙修行
布施波羅蜜多廣說乃至一切相智令極圓
滿是故慶喜我以般若波羅蜜多甚深經典
付囑於汝應正受持讀誦通利莫令忘失慶
喜當知除此般若波羅蜜多甚深經典受持
本二十三
諸餘我所說法設有忘失其罪尚輕若於般
若波羅蜜多甚深經典不善受持下至一句
有所忘失其罪甚重慶喜當知若於般若波
羅蜜多甚深經典下至一句能善受持不忘
失者獲福無量若於般若波羅蜜多甚深經

典不善受持下至一句有忘失者所獲重罪
同前福量是故慶喜我以般若波羅蜜多甚
深經典殷懃付汝當正受持讀誦通利如理
思惟廣爲他說分別開示令受持者究竟解
了文義意趣慶喜當知若善男子善女人等
於深般若波羅蜜多受持讀誦究竟通利如
理思惟廣爲他說分別開示令其解了則爲
受持攝取過去未來現在諸佛世尊所證無
上正等菩提慶喜當知若善男子善女人等
起般淨心現於我所欲持種種上妙花鬘乃

至燈明供養恭敬尊重讚歎無懈倦者當於般若波羅蜜多至心聽聞受持讀誦究竟通利如理思惟廣爲他說分別開示令其解了或復書寫衆寶莊嚴恒以種種上妙花鬘乃至燈明供養恭敬尊重讚歎無得懈息慶喜當知若善男子善女人等供養恭敬尊重讚歎甚深般若波羅蜜多則爲現前供養恭敬尊重讚歎我及十方三世諸佛慶喜當知若善男子善女人等聞深般若波羅蜜多起殷淨心恭敬愛樂即於過去未來現在一切如

來應正等覺所證無上正等菩提起殷淨心恭敬愛樂慶喜若汝愛樂於我不捨於我亦當愛樂不捨般若波羅蜜多甚深經典下至一句無令忘失慶喜我說如是般若波羅蜜多甚深經典付囑因緣雖經無量百千大劫亦不可盡舉要而言如我既是汝等大師甚深般若波羅蜜多當知亦是汝等大師汝等天人敬重於我亦當敬重甚深般若波羅蜜多是故慶喜我以無量善巧方便付汝般若波羅蜜多甚深經典汝當受持勿令忘失我

珠二

十四

今持此甚深般若波羅蜜多對諸天人阿素洛等無量大衆付囑於汝應正受持無令忘失慶喜我今實言告汝諸有淨信欲不捨佛欲不捨法欲不捨僧復欲不捨三世諸佛所證無上正等菩提定不應捨甚深般若波羅蜜多如是名為我等諸佛教誠教授諸弟子法慶喜當知若善男子善女人等愛樂聽聞甚深般若波羅蜜多受持讀誦究竟通利如理思惟以無量門廣爲他說分別開示施設建立令其解了精進修行是善男子善女人

等速證無上正等菩提能近圓滿一切智智所以者何諸佛無上正等菩提一切智智皆依如是甚深般若波羅蜜多而得生故慶喜當知三世諸佛皆依如是甚深般若波羅蜜多出生無上正等菩提是故慶喜若菩薩摩訶薩欲得無上正等菩提當勤精進修學如是甚深般若波羅蜜多所以者何甚深般若波羅蜜多是諸菩薩摩訶薩母生諸菩薩摩訶薩故慶喜當知若菩薩摩訶薩勤學六種波羅蜜多速證無上正等菩提是故慶喜我

珠二

十五

以此六波羅蜜多更付囑汝當正受持無令忘失所以者何如是六種波羅蜜多是諸如來應正等覺無盡法藏一切佛法從此生故慶喜當知十方三世諸佛世尊所說法要皆是六種波羅蜜多無盡法藏之所流出慶喜當知十方三世諸佛世尊皆依六種波羅蜜多無盡法藏精勤修學證得無上正等菩提慶喜當知十方三世諸佛世尊聲聞弟子皆依六種波羅蜜多無盡法藏精勤修學已正當入無餘涅槃復次慶喜假使汝爲聲聞乘

人說聲聞法由此法故三千大千世界有情一切皆得阿羅漢果猶未爲我作佛弟子所應作事汝若能爲菩薩乘人宣說一句甚深般若波羅蜜多相應之法即名爲我作佛弟子所應作事我於此事深生隨喜勝汝教化三千大千世界有情一切皆得阿羅漢果復次慶喜假使三千大千世界一切有情由他教力非前非後皆得人身俱時證得阿羅漢果是諸阿羅漢所有施性戒性修性諸福業事於汝意云何彼福業事寧爲多不慶喜答

言甚多世尊甚多善逝彼福業事無量無邊
佛告慶喜若有聲聞能爲菩薩宣說般若波
羅蜜多相應之法經一日夜所獲福聚甚多
於彼慶喜當知置一日夜但經一日復置一
日但經半日復置半日但經一時復置一時
殊二
但經食頃復置食頃但經須臾復置須臾但
經俄爾復置俄爾經彈指頃是聲聞人能爲
菩薩宣說般若波羅蜜多相應之法所獲福
聚甚多於前何以故此聲聞人所獲福聚超
過一切聲聞獨覺諸善根故復次慶喜若菩

薩摩訶薩爲聲聞人宣說種種聲聞乘法假
使三千大千世界一切有情由此法故悉皆
證得阿羅漢果皆具種種殊勝功德於意云
何是菩薩摩訶薩由此因緣所獲福聚寧爲
多不慶喜若言甚多世尊甚多善逝是菩薩
摩訶薩所獲福聚無量無邊佛告慶喜若菩
薩摩訶薩爲聲聞乘或獨覺乘或無上乘善
男子等宣說般若波羅蜜多相應之法經一
日夜所獲福聚甚多於前慶喜當知置一日
夜但經一日復置一日但經半日復置半日

但經一時復置一時但經食頃復置食頃但經須臾復置須臾但經俄爾復置俄爾經彈指頃是菩薩摩訶薩能爲三乘善男子等宣說般若波羅蜜多相應之法所獲福聚甚多於前無量無數何以故甚深般若波羅蜜多相應法施超過一切聲聞獨覺相應法施及彼三乘諸善根故所以者何是菩薩摩訶薩自求無上正等菩提亦以大乘相應之法示現教道讚勵慶喜他諸有情令於無上正等菩提得不退轉慶喜當知是菩薩摩訶薩自

珠二十七
修六種波羅蜜多亦教他修六種波羅蜜多廣說乃至自修一切智智亦教他修一切智智由是因緣善根增長若於無上正等菩提有退轉者無有是處爾時世尊四衆圍繞讚說般若波羅蜜多付阿難陀令受持已復於一切天龍藥叉健達縛等大衆會前現神通力令衆皆見不動如來應正等覺聲聞菩薩大衆圍繞爲海喻會宣說妙法及見彼土嚴淨之相其聲聞僧皆阿羅漢諸漏已盡無復煩惱得真自在心善解脫慧善解脫如調慧

馬亦如大龍已作所作已辨所辨棄諸重擔
逮得已利益諸有結正知解脫至心自在第
一究竟其菩薩僧一切皆是衆望所識得陀
羅尼及無礙辯成就無量殊勝功德佛攝神
力令此衆會天龍藥叉健達縛等不復見彼
不動如來應正等覺聲聞菩薩及餘大衆并
彼佛土嚴淨之相彼佛衆會及嚴淨土皆非
此土眼根所對所以者何佛攝神力於彼遠
境無見緣故爾時佛告阿難陀言不動如來
應正等覺國土衆會汝更見不阿難陀言我

不復見彼事非此眼所行故佛告具壽阿難
陀言如彼如來衆會國土非此土眼所行境
界當知諸法亦復如是非眼根等所行境界
慶喜當知法不行法法不見法法不知法法
不證法慶喜當知一切法性無能行者無能
見者無能知者無能證者無動無作所以者
何以一切法皆無作用能取所取性遠離故
珠二十八
見者無能知者無能證者無動無作所以者
何以一切法皆無作用能取所取性遠離故
以一切法不可思議能所思議性遠離故以
一切法如幻事等衆緣和合相似有故以一
切法無作受者妄現似有無堅實故慶喜當

知若菩薩摩訶薩能如是行能如是見能如是知能如是證是行般若波羅蜜多亦不執著此諸法相慶喜當知若菩薩摩訶薩如是學時是學般若波羅蜜多慶喜當知若菩薩摩訶薩欲得一切波羅蜜多遠疾圓滿至一切法究竟彼岸應學般若波羅蜜多所以者何如是學者於諸學中爲最爲勝爲尊爲高爲妙爲微妙爲上爲無上利益安樂一切有情無依護者爲作依護諸佛世尊開許稱讚修學般若波羅蜜多慶喜當知諸佛菩薩學

此學已住此學中能以右手若右足指舉取三千大千世界擲置他方或還本處其中有一珠^二不知不覺無損無怖所以者何甚深般若波羅蜜多功德威力不可思議過去未來現在諸佛及諸菩薩學此般若波羅蜜多於去來今及無爲法悉皆獲得無礙智見是故慶喜我說能學甚深般若波羅蜜多於諸學中爲最爲勝爲尊爲高爲妙爲微妙爲上爲無上慶喜當知諸有欲取甚深般若波羅蜜多量邊際者如愚癡者欲取虛空量及邊際何

以故甚深般若波羅蜜多功德無量無邊際故慶喜當知我終不說甚深般若波羅蜜多功德勝利如名身等有量邊際所以者何名句文身是有量法甚深般若波羅蜜多功德勝利非有量法非名身等能量般若波羅蜜多功德勝利亦非般若波羅蜜多功德勝利是彼所量爾時慶喜便白佛言何因緣故甚深般若波羅蜜多說爲無量佛告慶喜甚深般若波羅蜜多性無盡故性遠離故性寂靜故如實際故如虛空故說爲無量慶喜當知

三世諸佛皆學般若波羅蜜多究竟圓滿證得無上正等菩提爲諸有情宣說開示而此般若波羅蜜多常無滅盡所以者何甚深般若波羅蜜多猶如虛空不可盡故諸有欲盡甚深般若波羅蜜多則爲欲盡虛空邊際慶喜當知布施等六波羅蜜多廣說乃至一切智智不可盡故皆非已盡今盡當盡所以者何如是等法無生無滅亦無住異如何可得施設有盡爾時如來從面門出廣長舌相遍覆面輪現舌相已還從口入告慶喜曰於意

云何世間若有如是舌相所發語言有虛妄
不慶喜對曰不也世尊佛告慶喜汝從今去
應爲四衆廣說如是甚深般若波羅蜜多分
別開示施設建立令其易了慶喜當知如是
般若波羅蜜多深密藏中廣說一切菩提分
珠二
法及諸法相是故一切求聲聞乘求獨覺乘
二十
求無上乘善男子等皆應依此甚深般若波
羅蜜多所說法門常勤修學勿生厭倦若能
如是常勤修學速當證得自所求義復次慶
喜甚深般若波羅蜜多是能悟入一切法相

是能悟入一切文字是能悟入陀羅尼門諸
菩薩摩訶薩應於如是陀羅尼門常勤修學
若菩薩摩訶薩受持如是陀羅尼門疾能證
得一切辯才諸無礙解慶喜當知甚深般若
波羅蜜多乃是過去未來現在諸佛世尊無
盡法藏任持一切微妙佛法是故我今分明
告汝若有於此甚深般若波羅蜜多受持讀
誦究竟通利如理思惟則爲受持三世諸佛
所得無上正等菩提慶喜當知我說如是甚
深般若波羅蜜多是能遊趣菩提道者之堅

固足亦是一切無上佛法大陀羅尼汝等若能受持如是甚深般若波羅蜜多陀羅尼者則爲總持一切佛法利益安樂一切有情

大般若波羅蜜多經卷第五百二十二

珠二

廿一